

# Ons Dag Se Brood

## NG Gemeente Noordkus

[Vandag se Skriflesing](#) | [Inteken](#) | [Dagstukkies Webwerf](#) | [Ek wil 'n Christen wees](#) | [Vorige Dagstukkies](#) | [Bestel Boeke](#)

18 Mei 2012

## Dawid se Gure Aanhangers

1 Samuel 22:1-23

Vir Dawid was die Filistynse stad, Gad 'n noue ontkoming. Hy het nie lank tevore nie 200 Filistyne doodgemaak, en dit moes sékerlik nog vars in hulle geheue wees. Dawid moet dus weer inderhaas vlug om daar weg te kom. Maar waarheen? Hy vlug na die Adullamgrot toe, sowat 16km suid-wes van Betlehem, op die grens tussen Juda en die Filistynse gebied. Hier is Dawid veilig, en hy laat sy familie ook kom sodat hulle Saul se vervolging kan vryspring. Die woord versprei baie gou oor waar Dawid wegkruip, en dan begin daar 'n streep van mense na Dawid uitwyk. Dit was sekerlik maar 'n rowwe klomp, want ons lees dat dit almal was wat op die een of ander manier in die moeilikheid was - mense wat moes vlug voor

hulle skuldeisers en mense wat verbitterd was oor iets. In Dawid sien hulle 'n leier wat hulle 'n veilige hawe kan gee in hulle beproewing. Aanvanklik daag daar omtrent 400 manne op, maar weldra groei die groep tot 600 manne en hulle aanhangsels.

Dawid is egter besorg oor sy ouers by hom in die grotte - hulle kan nie onbepaald daar bly nie. Dan gaan lê Dawid 'n besoek af by die koning van Moab. Dit is immers waar sy eie Oumagrootjie, Rut vandaan kom - miskien sal die koning hom goedgesind wees. En inderdaad werk dit, en Dawid se ouers gaan bly by die koning so lank as wat hy in die bergvesting skuil.

Op 'n dag kom die profeet Gad na Dawid toe: “Dawid, jy kan nie langer hier in die grot wegkruip nie.” vermaan hy hom. Dawid moet uitkom in die ope en na Juda gaan. Tussen sy eie mense moet hy hom gaan vestig sodat hy hulle vertrou kan wen vir die dag wanneer hy koning word. Hierdie profeet sou later 'n baie groot rol in Dawid se lewe speel.

Dawid moes op die harde manier leer dat 'n mens nie hoë doelwitte kan bereik deur jou te onttrek uit die samelewing nie. Vandag is dit steeds so - God wil jou en my gebruik juis binne die samelewing. Dit is daar, tussen mense waar ons eers

werklik ons Christenskap kan uitleef.

Intussen is 'n tragedie besig om te ontvou by Saul. In Gibeon sit Saul in die skadu van 'n Tamarisk - sy spies in sy hand. Hy is op soek na Dawid om hom dood te maak. Die swart wolk oor Saul se gemoed kry die oorhand oor hom, en hy begin sy amptenare en die lede van sy stam, Benjamin te beskuldig dat hulle teen hom saamsweer. Niemand het hom vertel dat sy eie seun met Dawid 'n verbond het nie. Niemand het medelye met hom, arme Saul nie. Almal is teen hom - so teem Saul voort, en die manne moet maar net luister hoe hulle afgekraak word.

Dan tree die slaaf Doëg na vore - hy was by toe Agimelek die brood en Goliath se swaard vir Dawid gegee het. Nou is Saul woedend. Hy laat ontbied Agimelek en sy hele familie asook al die priesters van Nob. Hulle moet kom rekenskap gee waarom hulle sy grootste vyand gehelp het.

Wanneer Agimelek voor Saul staan, kan hy nie sy verbasing verberg oor hierdie verskriklike aantygings nie. Ja, natuurlik het hy vir Dawid gehelp, want Dawid is mos Saul se groot generaal, en boonop sy skoonseun! Wat is dan nou verkeerd daarmee?

Maar Saul wil geen rede verstaan nie, en dan beveel hy sy amptenare om

Agimelek en sy gevolg dood te maak. Maar nie een van die amptenare sien kans daarvoor nie - hulle is dan manne van God! Dan word Doëg beveel om die grusame taak te verrig. Daardie dag wis hy vyf en tagtig priesters uit. Ook hulle gesinne word nie gespaar nie, en almal, selfs die babas en diere in die dorpie Nob word verteer deur die bloedige swaard van Saul. Slegs een enkele priester, Abjatar ontsnap, en vlug na Dawid. Hy het later 'n groot invloed in Dawid se regering.

Saul, die man wat eenmaal 'n man na God se hart was, het nou alles wat heilig is verwerp. Hy het selfs geen ontsag vir priesters of profete nie. Dawid, aan die ander kant, is besig om rondom hom al die uitgeworpenes van die samelewing te versamel. Hy ontferm hom oor almal wat vervolgt word en wat swaar kry. Hy bied vir hulle 'n tuiste en gemoedsrus aan. Hy kry dan ook al hoe meer steun van die gewone mense, want hulle sien gou raak dat hy omgee vir hulle. Dawid se steun brei uiteindelik uit na al die vlakke van die samelewing - beswaardes, vlugteling, priesters, profete en selfs prinse.

Wie is die mense wat onder jou vriendekring tel? Is dit slegs diegene wat iets in die lewe bereik het? Is dit slegs die invloedrykes of “goeie” mense? Dawid se vriendekring was baie verdag. Maar so was Jesus se vriendekring - daar was prostitute en tollenaars en egbreeksters en allerhande gure karakters. Dit is die

soort mense met wie Jesus Hom opgehou het (en ook Dawid). Is dit nie dalk ook wat Hy vandag van my en jou vra nie? Moet ons nie 'n slag gaan herbesin oor wie ons mee meng nie? Gee ek werklik nog om vir diegene wat swaarkry of wat iewers in die lewe gestruikel het?

### **Gebed:**

**Here, help my asseblief om my hart oop te maak vir mense wat minder bevoorreg is as ek - dat ek nie sal anderpad kyk wanneer iemand my nader om hulp nie.**